

920097 II

Biblioteka Jagiellońska



stdr0024434



920097 II
Mac. St. Dr.

IN FUNERE
REVERENDISSIMI PATRIS
ANTONINI BREMONDII
GENERALIS PRÆDICATORUM ORDINIS
MAGISTRI
ORATIO

Habita XVIII. Kalend. Quintil. An. MDGCLV

JOANNE ALOYSIO BONGIOCHIO

CLER. REG. SCHOLARUM PIARUM

In Novo Collegio Calasancio Eloquentiæ Professore.

ROMÆ

Ex Typographia Hieronymi Mainardi.

SUPERIORUM FACULTATE.



REIMPRESSUM

In Typographia S. R. M. Monasterii Pocza: Ord. S. BASILII M.
Cura Conventus S. Montis Rosariani Ordinis Prædicatorum.

*Ant. Lahti
typogr.*



ORATIO.



QUAMQUAM ea sit humanæ vitæ conditio, ut angustis finibus circumscribatur; & incerti adeò eventus valetudinis, ut unicuique nostrum semper de morte cogitandum sit; ea demum naturæ communis fragilitas, ut quotidie non magis vivere, quàm interire, videamur; tamen hæc universa calamitas non mediocri consolatione leniretur, si ii saltem homines immortales esse possent, quorum tanta extitit virtus, ut, quum de omnibus bene meruerint, in eorum salute ac vita, omnium salus atque felicitas contineatur. Verùm quis erit expers adeò humanitatis, tam ignarus rerum, tam nihil unquam nec de sua, nec de communi utilitate cogitans, qui possit lacrymas, & doloris impetum cohibere, quum non humiles modo vulgaresque homines interire videat, qui otio ignaviæque dediti vitam inglorii traduxere; sed illos etiam ab omni parte spectatissimos, qui, quum & pietate, & do-

cūrina, & sapientia maximè floruerint, ad tuendam firmandamquē
 ceterorum felicitatem à Deo non commodati potius, quàm dona-
 ti esse videbantur? Itaque vestrū omnium quilibet facile intelligit,
 Auditores, quam jure ac meritò verba facturus in hoc tam gravi,
 ac luctuoso rerum miserrimarum apparatu animò penitus me con-
 cidisse profitear. Qui enim gravissimè non perturber, cujus oculis-
 obversatur & in parietibus squalor, & altum in ore populi silen-
 tium, & piissimorum virorum jam erumpentes lacrymæ, & fu-
 nebris pompa, & exequiæ, & faces; quæ, dum P. Antoninum
 Bremondium (proh Deus immortalis quem virum, quantaque virtu-
 te præstantem!) dum P. Antoninum Bremondium universi Prædica-
 torum Ordinis moderatorem amplissimum è vivis ereptum subjici-
 unt, in hoc uno funere probatissimum pietatis exemplar, litera-
 rum reipublicæ decus eximium, virum denique publicæ utilitatis
 studiosissimum extinctum esse testantur. O acerbam, ac planè vix
 ferendam calamitatem! Præclarissimus & à sanctitate, & ab ampli-
 tudine, & à doctrina nunquam satis laudatus Prædicatorum Ordo
 parentem amisit optimum, vigilantissimum moderatorem amisit
 suum. Verum, quia vir ille sanctissimus ita semper se gessit, ut
 non magis suis, quam aliis etiam vixerit; omniumquē ordinum
 studia & morum suavitate, & prudentia, & liberalitate sibi miri-
 ficè conciliaverit; Ordinis unius, quamquam eximii calamitas, ca-
 lamitas bonorum omnium est, Auditores; atquē adeò grave est
 vulnus, ut frustra immensum tanti viri desiderium, atquē enor-
 mis jacturæ casum doloris magnitudine exæquari posse creda-
 mus. Itaque lugeant religiosissimi viri, qui illum patris loco ha-
 buerunt; doleant boni omnes, qui fidelissimo actionum, senten-
 tiarum, voluntatumquē socio & comite caruerunt; mœreant no-
 bilissimæ virtutes illæ, quas ab ineunte ætate ad extremum usque
 vitæ spiritum diligentissimè excoluit, quibus nihil potuit contin-
 gere acerbius, nihilquē majore lacrymarum contentione deslen-
 dum

dum. Quamquam, Auditores, quid longius in luctuosissima tanti infortunii non recordatione minus, quam inani lamentatione, detinemur? Quare diu contristari debemus de dormientibus, sicut & cæteri, qui spem non habent? Si Bremondus hanc lucis usuram reddidit, sapientis animi sit id humanis casibus naturæque communis fragilitati tribuere. Quia tamen sum morum hominum nec brevis vita dicenda est, nec immaturus interitus, si tamdiu vixerint, donec quidquid sibi aliisque debebant, solverint; magnò erectoque animò esse nos jubet rerum ab eo gestarum splendor, quæ tot tantæque sunt, ut non inopinatò importuneque sublatus, sed naturam ipsam explevisse vivendi satietate videatur. Igitur hæc nos una consolatio sustentet, hæc mœrore perculsos prostratosque erigat animos, hæc lacrymas doloremque omnem abstergeat, quod Antoninus Bremondus ita vixerit, ut satis sibi vixerit, satis suis, satis omnibus. Satis sibi vixit, quod omni religiosi viri pietate defunctus sit; satis vixit suis, quod iis regendis præfectus omnes moderatoris optimi partes diligentissimè expleverit; satis vixit omnibus, quod omnium ordinum studiosissimus universos privatis publicisque officiis perpetuò sibi devinxerit.

Et quoniam pietas est fundamentum omnium virtutum, hinc exordiat, oportet oratio mea, ut Antoninum Bremondium quod omni religiosi viri pietate defunctus sit, satis sibi vixisse intelligatis. Quod quidem dum præstare conabor, nolite putare Auditores, velle me ea persequi diligentius, quæ, si minus fortasse necessaria sunt, at certè, quum sunt prolata, meritò suò commendantur. Quare in tanta rerum maximarum copia, nihil dicam de pueritiæ laudibus, quam in Oppido primùm (Cassidium vocant) agri Massiliensis amœnissimo, ubi ab honestissimis parentibus liberaliterque institutis fuerat procreatus; cum deinde Arelate, tum demum Massiliæ eleganter traduxit, non modò in iis,

quæ moribus ad virtutem componendis inserviunt; sed etiam in optimarum artium studio, quibus illa ætas ad doctrinam sapientiamque effingitur. Ad egregiam Bremondii adolescentiam oculos mentemque convertite, in qua non modo nihil unquam est reprehensum, sed laudata sunt omnia: atque in primis ad firmam illam animi constantiam, quâ carissimus, non jam parentibus (utrumque enim infans amiserat) sed affinibus, sed propinquis, sed aviæ spectatissimæ feminæ, quam, non secus ac parentes, pietate propè singulari observavit; quum magnum sui desiderium omnibus reliquisset, quintum vix supra decimum ætatis annum agens, oblitus est populum suum, & domum patris sui, ut exhiberet semetipsum hostiam viventem, sanctam, Deo placentem, & in sancti Maximini Provinciæ Tolosanæ Collegio in simplicitate cordis, & innocentia spiritûs, sanctissimis Prædicatorum Familiæ institutis se devinciret. Quâ verò animi contentione religiosæ vitæ tyrocinium inierit, quâ alacritate sit persequutus, quâ virtutis commendatione perfecerit; satis aperte declarat anxius ardor ille ac vehemens, quò leges omnes atque præcepta, quibus susceptæ vitæ ratio continebatur, non memoriâ modo comprehenderet, verum etiam sedula exercitatione altius in mente imprimeret, ad quorum exemplar deinceps actiones omnes, cogitationesque componeret. Absolutò verò tyrociniò, quum sacramentò arctius pietati se obstrinxisset, quæ fuerit in posterum ejus religio, quæ integritas, quæ temperantia, quæ liberalitas, quæ modestia, quæ fides, dicant omnes, quibuscum domi familiarissimè vixit; quibus utinam ex hoc ipso loco differere, atque per ejus laudes excurrere concederetur! Quàm multa enim, quàm præclara, quàm splendida de tanto viro proferrent, quæ, si audiantur, plurimum admirationis non minus sint habitura, quàm gloriæ? Etenim sese in lucem amplissimam explicaret eximia Bremondii modestia, cujus

in agendo æquitas, cujus pudor in dicendo, cujus comitas cum gravitate conjuncta aliorum animos ad se rapiebat; qui, licet & doctrina, & prudentia, & dignitate plurimis antecelleret; de aliis tamen gloriosius, de se verò humiliter demisseque sentire visus est; qui longissimè à quopiam provocando violandoque verbis, vel scripto abhorrens; quum aliorum, quæ vel sibi non arriderent, vel minùs veritati consentirent, opiniones refelleret, scriptor moderatissimus Auctoribus semper pepercit, non conflavit invidiam, non protulit nomina. Quam quidem in summis etiam viris desideratam aliquando modestiam tacitus præterire non potuit, & præconiò fraudare suò vir planè doctissimus Ludovicus Muratorius (a), cujus splendida atque immortalis futura est in omne literarum genus fama meritorum. Illustraretur incorrupta ejus justitia, quâ nec partium studio, nec sui amore potuit ullo unquam tempore ab iis, quæ debita, & recta putasset, aut suscipiendis retardari, aut perficiendis dimoveri. Erumperet morum facilitas ac mansuetudo, quâ sibi illatas aliquando injurias (quis enim, licet optimus, vitæ suæ cursum sine ulla doloris, aut injuriæ offensione conficiat?) non modò nunquam ultus est, aut conquestus, quum posset; sed ne significavit quidem acceptas. Quid verò de ejus liberalitate dicerent? qui ex annuo amplissimoque censu, qui præsidium erat, & ornamentum dignitatis suæ, nihil panè decerpebat, quod in privatum suum commodum cederet; sed in aliorum utilitatem religiose conferre studens aut opitulabatur pauperibus, aut præclara suorum ingenia ad liberalissimas Facultates impensius excolendas propositò præmiò incendebat, aut Ordinis universi gloriam dignitatemque curabat. Quid de effusa illa ac nunquam intermissa animi contentione? quâ, quum naturæ quodam

(VIII)

quasi impetu ad severiores disciplinas raperetur , in iis ita profecit , ut vix quinque , & viginti natus annos in Sancti Maximi Collegio Philosophiam summa cum laude publicè profiteretur ; & eam in sacris præsertim doctrinis assequeretur peritiam , quam multa & maxima ab eo edita , & communi sapientum plausu recepta monumenta testantur . Quid tandem de vitæ integritate ? cujus amore non modò ab omnibus , quæ honestum virum vel minimùm dedecerent , studiosissimè abhorruit ; solitus & peccata quotidie piò dolentiquè animò aperire ; & palam dicere singulos , quos vivebat , dies tyrocinium sibi ad mortem esse ; sed etiam instituti sui leges præscriptionesquè constanter adeò diligenterquè observavit , ut earum semper religiosus habitus sit & custos , & exemplar , & vindex . Quod quidem tum vel maximè ostendit , quum in Martinica Americæ Insula , bis contractò ex pestilentia morbò , ad supremum panè vitæ spiritum adactus fuit . Etenim ad comprimendam morbi vim , temperandumquè æstum , nec Medicorum consiliis , nec suorum precibùs adduci potuit , ut laneam subuculam exueret ; non secus ac si turpe sibi putasset ex hominum vita aliis indutum vestibùs demigrare , quàm quæ Ordinis sui legibùs præscribebantur . Atque hinc facile erit intelligere , Auditores , cur Bremondus modestiâ , integritate , liberalitate , fide , doctrinâquè insignis , religiosæ vitæ Tyronibus instituendis , & ad maturam consummatamquè virtutem effingendis componendisquè præfectus fuerit : quo in munere omnium difficillimo quanta cum laude se gesserit , splendidò gravissimòque testimoniò suò comprobavit vir plane sanctissimus P. Petrus Paullus ejusdem Familiæ alumnus ; qui , quamquàm ætate gravis , pietate insignis , & virtutum omnium ornamentò præstans effloresceret ; tamen ad Bremondii famam sempiternam (dicam rem panè incredibilem) rursus in religio-

religiosæ vitæ Tyrones, qui sub illius disciplina vivebant, referri voluit; ut tanto sub magistro, tantoque sub duce, vitæ suæ cursum mirabilis ad laudem, & propè singularis absolveret. Hæc de Bremondii pietate delibata à me potius sunt, quàm exposita: quæ quidem nemo arbitretur me ideo verbis extollere, & exornare dicendo, quòd Ordo meus hoc semper gloriosissimum sibi duxerit, ut cum spectatissimo Prædicatorum Ordine, à quo innumeris beneficiis cumulatissimè devinctus est, conjunctissimè viveret. Honesto cordatoque viro semper indignum putavi privatum publico officio anteferre, & aliorum gratiam assentationibus aucupari; putaremque tanti viri memoriæ acerbum à me vulnus infligi, si ea verbis exaggerarem quæ ita per se ampla sunt, ut, si oratione complectare, verendum sit, ne imminuas potius, quàm efferas, ne potius extenues, quàm exornes. Quem enim fugiant tam crebra, tamque præclara solidæ virtutis indicia, non domesticis tantum, sed publicis inusta notis veritatis? Atque hujus quidem rei testes mihi esse debent quotquot eundem in Urbe hac florentissima, in qua tot annos versatus est habitans in oculis, aut agnoverunt, aut illo usi sunt familiariter. Quod si taceant, aut dissimulent, loquetur, ac palam faciet longè lateque pervagata famæ celebritas, quâ non vicinis modò, sed longinquis etiam fuit notissimus. Quis enim Bremondium non coluit, non dilexit, non observavit? Quanti non fecerunt complures nostræ ætatis eruditissimi viri, qui libris editis, amplissimoque ejus nomini inscriptis, ipsum studiorum suorum auspicem selegerunt? (b)

A5

Quanto

(b) Scilicet Doctissimi viri P. Abbas Trombellius partem alteram annotationum Marci Marini in Psalmos; P. Callogerá Tom. XLIII. Opusc. Philolog.; P.D. Joseph Catalanus libros de Magistro Sacri Palatii, & de Secretario Indicis; & P. Mamacchius Tom. I. Antiquitatum Christianarum.

Quanto in eum amore non extitit nobilissimus piissimusque Aureliæ Dux, qui non modò per literas cum Bremondio sapissimè, familiarissimeque colloquebatur; sed moriens, quum Prædicatorum Familiæ, quam semper habuit carissimam, Bibliothecam suam non minùs librorum copiâ, quam pretiò selectissimam, testamentò legasset; ad arbitrium Bremondii contulit, ex Ordinis sui Collegiis cui vellet, adscribere? Quot ex amplissimo Purpuratorum Patrum Senatu gratiam, & familiaritatem non inivit? Quibùs amoris, & benevolentiae officiis non est prosequutus potentissimus & Galliarum, & utriusque Siciliae, & Sardiniae, & Magnae Britanniae Rex, in primisque Maria Clementina uxor hujus sanctissima, cujus hortatu Christianae doctrinae commentarium Italico sermone vulgavit? Quàm non erat facilis, quàm non benigna humanitas, quâ illum Benedictus XIII. Pontifex Optimus Maximus complectebatur; quem saepe ad privata colloquia congressusque secum esse jubebat, & consiliorum suorum participem, ac socium admittere aliquando non dubitabat? Quibùs denique, & quàm singularibus beneficiis longo annorum usu non ornavit Bremondium BENEDICTUS XIV. Pontifex item Maximus, & ingeniorum aestimator æquissimus, quem dignitate, doctrinâ, sapientiâque verè summum ad Christiani Orbis felicitatem, florentem ac fospitem vivere sibi boni omnes gratulantur; quique, quanti faceret Bremondium, non verbis modò, sed libris etiam suis scriptis ad immortalitatem non semel publicè testatus est? Quò quidem gravissimò de Bremondii virtute judiciò nec præstantius ullum proferri poterat, nec optari splendidius. Etenim palam prædicat (atque, ut omnes exaudiant, clarissima voce dicam) palam prædicat *propter religiosas virtutes, eximiamque doctrinam sibi inprimis gratum atque acceptum; & de fami-*

familia sibi commissa in omnibus , ac præsertim ob literarios labores optime meritum ; & omnium virtutum , doctrinarum , disciplinarumque splendore conspicuum ; dignum propterea , qui non solum Pontificiam suam , (quæ una per se omnem laudem ejus absolvit) sed cunctorum etiam Ordinum hujus Urbis gratiam benevolentiamque sibi conciliaverit . (a) Sed quid plura commemoro ? Quàm carus esset omnibus acceptusque Bremondus , nos ipsi quidem planè sensimus , quotquot in hac Urbe versamur . Quum enim quatuor ab hinc annos improvise gravissimoque morbo correptus ingentem omnibus de salute sua metum injecit ; nonne suspensa atque sollicita tota civitate , vidimus nobilissimos omnium ordinum viros , unumquemque ex Purpuratis Patribus spectatissimum , Magnæ Britanniae Regem , ipsum denique Pontificem Maximum ad illum confluere ; ad eum accedere ; ipsum lecto jacentem invisere ; perturbationem , quam ex ejus periculo conceperant , commemorare ; de recuperata valetudine gratulari ; hortari denique , ut deinceps salutis suæ vellet diligentius consulere ; ne , qui omni religiosi viri pietate defunctus satis sibi vixerat , suis immaturus decederet ? Atque hoc potissimum in causa fuit , Auditores , cur dignus æternæ memoriæ vir , & maximarum virtutum commendatione celebratus , aliis demum regendis præficeretur , positusque esset super candelabrum , ut luceret omnibus , qui in domo forent . Jam pridem enim ostenderat , qualis quantusque is erat futurus , qui omnia in se uno complectebatur , quæ talem virum ornant atque perficiunt . Ostenderat in solemnibus totius Ordinis Comitibus anno MDCCXXV . Bononiæ habitis , ubi , quum de rebus gravissimis & ad rem Christianam in Americanis insulis augendam firmandamque spectantibus , in eo amplissimo summorum virorum con-

B

ventu

(a) Vide Act. Comit. Gen. Bononiæ hab. ann. 1748. pag 16. itemque Acta quinque Martyrum Sinenſium pag, 273. & 275.

ventu palam rogatus esset sententiam, tantâ se præbuit sapi-
 entiâ consiliiqûe maturitate præditum, ut omnium sibi amorem
 admirationemqûe conciliaverit. Ostenderat & Romæ, ubi in Ca-
 sanatenfi Bibliotheca Theologicorum interpret, & pro Galliarum
 Provinciis cooptatus in Quinqueviros, qui unâ cum supremo
 moderatore universum Ordinem administrant, ea in illis procu-
 randis enituit fide, prudentia, integritate, ut sapientissimo ma-
 ximeqûe viro Thomæ Ripollio, supremo tunc Ordinis Magi-
 stro, apprime carus extiterit; eôqûe è vivis sublato, tandem
 meruerit, ut unanimi Electorum consensione, & incredibili cum
 omnium ordinum, tum Pontificis Maximi lætitia ac plausu u-
 nus ex omnibus, atqûe ex magnis summus deligeretur, qui
 tanto viro in totius Ordinis administratione succederet; ut ea
 pietatis, doctrinæqûe ornamenta, quibûs nonnisi paucos privatus
 ditaverat, in alios quoqûe diffunderet; quod quidem à Domino
 factum fuit, ac propterea visum est mirabile in oculis omnium.
 Atqûe debet hoc loco inclytus clarissimûsqûe Prædicatorum Or-
 do sibi gratulari quodammodo, quod talem in Bremondio mo-
 deratorem sortitus esset, qui veterem ejus gloriam conservaret
 attente, &, si fieri potuisset, nova laudis accessione studiosissimè
 amplificaret. In vinea enim Domini constitutus quô unquam
 tempore ab iis suscipiendis, perficiendisqûe recessit, quæ muneri
 sui ratio atqûe instituta postulassent? Testes religiosissimos ap-
 pello viros, quibuscum ille demi in spiritu, & lenitate fa-
 miliarissimè vixit; quiquè consiliorum ejus participes, quòd
 præsentem intuebantur, illius mentem sensusqûe, & os cernebant,
 incredibile dictu est, quibûs prosequerentur studiis, quibûs efferrent
 laudibûs, quâ benevolentia complecterentur. Revera quid de illo o-
 ptandum supererat, in quo maxima erant omnia; quiquè summa in
 Ordine auctoritate potitus cæteris præire studuit, ut, quæ ver-
 bis inculcaret quotidie, confirmaret exemplis? Nemo ^{ille} Dei O-
 ptimi

ptimi Maximi cultus, sacrarumque caerimoniarum studiosior, qui ut res divina rite sanctèque, ac omni cum dignitate fieret, sedulo, perpetuòque curavit. Nemo in observandis religiosæ vitæ institutis diligentior; qui, quamquam una virtute duce in splendido honoris fastigio constitutus; quamquam innumeris gravissimisque distentus negotiis; quamquam infirma sæpe usus valetudine; tamen de pristino vivendi more nihil unquam remiserit. De omnibus benemerendi cupidus, singulos diligebat ut filios, non verbo, & sermone, sed opere, & veritate: quumque nitidam constantemque frontis jucunditatem præferret, rectæ conscientiæ judicium, quâ nihil timent, qui nihil admisserunt; eorum ad se rapiebat animos aurea oris, & vocis suavitate; sibi que arctius liberalitate obstringebat, quâ illis ita præsto erat, ut nemo ab eo tristis unquam discesserit. Prudentiæ verò consilii que plenus, nullis unquam fractus laboribus, in providendo acer & industrius, ad res suscipiendas promptus, paratus ad persequendas, ad conficiendas expeditus, quàm sollicitè, quàm industriè, quàm fortiter Ordinis universi gloriam, utilitatemque curare visus, gloriam, quam unice præ oculis, præ manibus, præ mente habebat; utilitatem, cui perpetuò inservivit, totumque se ostentavit? Sed quis singula, quæ in Ordinem suum beneficia contulit, oratione complecti possit? Ille ad barbaras, remotissimasque gentes ex suis complures virtute, doctrinâque instructissimos misit, ut verâ solidaque doctrinâ, cui Prædicatorum Ordo semper studuit quàm qui maximè, perditas hominum mentes à vitiis corruptisque moribus ad veræ religionis cultum feliciter revocarent: atque ut sacris peragendis ministrandisque parati quovis tempore essent atque expediti, verbis hortatus est, pecuniâ adjuvit, exemplòque inflammavit suò. Etenim cum fortè fortunâ ad Sanctæ Agnetis extra muros venisset, nec adesset Sacerdos, qui ægotantem

(XIV)

feminam sacrô reficeret Viaticô : ille , qui supremus tunc erat Magister Ordinis , hilari libentiquè animô id ministerii obivit . Ille & solertiâ , & auctoritate , quâ valuit , valuit autem plurimùm , perfecit tandem ut aurea ac propè cœlestis S. Thomæ doctrina , cujus semper vixerat tenacissimus , etiam extra sui Ordinis fines latius propagaretur . Ille , qui res gestæ quinque ex inclyti Ordinis sui alumni fortissimorum hominum , recens suâquè memoriâ pro Christo à Sinensibus immannissimè trucidatorum , ut literis consignarentur , curaverat , ex quorum numerô Petrus Martyr Sanfius , & Franciscus Ser ranus ; ille idem impetravit , ut Joanni Licio , Joannæ Urbevetanæ , Marcolino Forolivienfi ex eadem familia alumni sanctissimis , qui omni virtutum laude clarissimi multò antè decesserant , publicô decretô solemnes Beatorum honores decernerentur . At quo labore , qua solitudine , qua liberalitate ? qui aliis in idem conspirantibus omnem non modò operam pollicebatur suam ; sed etiam aliquando pro necessariis sumptibus ultrò liberaliterquè fidem suam obligavit . (a) Ille Acta in comitiis Ordinis Generalibus colligi jussit ; selectissimosquè viros constituit , qui universam Ordinis sui historiam , cui adornandæ jam pridem ipsemet manus admoverat , conscribendam fusciperent ; ut ad immortalem Ordinis ejusdem gloriam pateret omnibus , quanta inde Christiana res recepisset & ornamenta dignitatis , & præsidia stabilitatis suæ . Quid ? Ne quidquam omitteret , quominus omnes optimi moderatoris partes explevisse videretur , non ne scholas instituit , in quibus religiosi adolescentes de amœnioribus literis erudirentur ? Non ne

quà

(a) *Litt. ad Cl. Virum P. Pium Thomam San-Vitalium datis 5. Non. Octobr. 1753. scribit Bremondus : circa la causa del B. Aimone Taparelli dei Conti di Lagnasco non si sgomenti , che quanto alle spese maggiori da farsi in Roma , sono io pronto a soccombervi.*

quâ exemplis, qua consiliis, qua præmiis egregia, & ad optima quæquæ comparata eorundem ingenia ad linguarum Græcæ & Hebraicæ, ad Matheseos, sacrarumquæ historiarum studia impulit incenditquæ; non ut liberalissimæ hæ disciplinæ apud eos reviviscerent (quî enim reviviscere poterant, quæ nunquam apud illos defecerant?) sed ut alacrius excolerentur; & Prædicatorum Familia, quæ à prima usque origine in omni doctrinæ genere ita effloruit, ut quovis tempore cum cæteris de principatu contenderit, harum ope paucas inveniret pares, majorem haberet neminem? O virum verè maximum, atquæ immortalis memoriæ dignissimum! Quid amplius per Deum immortalem ab eo potuisset optari? quum, ex quo ad summam totius Familiæ suæ curandam accessit, nihil unquam cogitârit, nihil viderit, nihil egerit, quod ad augendam illius gloriam splendoremquæ non pertineret; semperquæ ita vixerit, ut satîs non modò suis, sed satîs vixerit omnibus; quippe qui omnium ordinum studiosissimus universos privatis publicisque officiis perpetuò sibi devinxerit. Quod dum dico, finite, Auditores, orationem meam exultare, quòd de Bremondii in omne genus hominum meritis ea in urbe disseram, eòquæ audiente populò, qui liberalitatis ejus testis, & particeps semper extitit. Quare de Bremondio divinum illud usurpabo libenter: *Tenuisti manum dexteram meam, & in voluntate tua deduxisti me, & cum gloria suscepisti me* (a): In voluntate sua deduxit eum Dominus, quum repente Prædicatorum præficiens Ordini, tanquam fidelem servum prudentemquæ constituit super Familiam suam, ut illius felicitatem splendoremquæ & defenderet, & augeret. Tenuit verò manum dexteram ejus, ut extenderet illam ad pauperes. Quàm crebra verò, quàm munifica misericordiæ suæ in egentes argumenta Bremondii non edidit? qui familias complures rei domesticæ inopiâ laboran-

13 laborantes secretò alebat ; accurrebatquē ad pauperum levandas angustias propere adeo atquē studiosè , ut calamitosi ad opem salutemquē sufficeret , Bremondium eorum calamitates non ignorare : quumquē suum nihil esse putaret , nisi quod eorum inopiæ large effusèquē donare posset ; mirum nemini esse debet , si ad eum frequentes quotidie confluerent , quem parentem beneficentissimum æquē ac amantissimum agnoscerent , colerent , venerarentur . Tenuit manum dexteram ejus , quā scriptor egregius , tot editis in lucem libris , literarum Rempubicam locupletaret , & in aliorum utilitatem quod sine fictione didicerat , sine invidia communicaret . Quod quanta cum laude sit consequutus , ut palam faciam , Auditores , non ea proferam , quæ graviter eleganterquē scripsit de inclyta Gusmana Gente , ut illius antiquitatem nobilitatemquē assereret , & vindicaret . Ut unusquisque intelligat , quantum doctrinā valuerit , satis superquē sit oculos animumquē ad immensum illud opus octo voluminibûs comprehensum convertere ; quò Bremondium summo cum labore , ingenii acumine , solertiâquē pænè incredibili splendida atquē amplissima , quibûs summi Pontifices Prædicatorum Familiam quovis tempore honestârunt , decreta collegit , digessit , perpetuisquē adnotationibûs ita opportunè ditavit illustravitquē , ut sapientum omnium judiciò non de suis magis , quàm de sacra historia omnibusquē literis optimè promeruerit . (a) Tenuit manum dexteram ejus , quum , licèt Romæ versaretur , tamen dies noctesquē de communi omnium salute cogitans , consilium iniit nonnisi summo homine dignum publicæquē utilitatis studiosissimo , quò novam Berolini plantatam Domini vineam , Ordiniquē commissam suo , omni virium conatu , & ingenti etiam collata pecunia juvaret ; atquē

(a) Vid . Ep . Enc . P . Thomæ Repollii operis Tom . I .
 prefix . pag . 10 .

atque aleret; ad eamquē excolendam novissimos operarios mitteret, qui suam doctrinam, patientiam, longaminitatem, fidem, propositumquē assequeuti, illorum hominum aures à fabulis ad veritatem converterent, & fructus uberrimos virtutis, honestatisquē colligerent. Quod dum memoria repeto, à lacrymis temperare vix possum. Aliud enim recorder magnificentiùs multo studii ejus de universis benemerendi argumentum, quod in hunc locum à meritiservandum putavi, quum speciem quandam præferat dignitatis atquē amplitudinis. Potest ne quispiam in promerendo diligentior se exhibere, quam si pro communi salute caput suum devoveat? Atqui majorem caritatem nemo habet, ut animam suam porat quis pro amicis suis. Agè verò, quā benefica voluntate erga alios moveretur Bremondus, quāso, diligenter attendite. In S. Maximini Collegio, pacatō otio, summāquē usus Bremondus tranquillitate, Philosophiæ studiis diligentissimam navabat operam; totusquē in eo versabatur, ut obscura quæquē ingenio pervaderet, & adolescentes, quos erudiendos susceperat, non ad fucatam atquē inanem, sed ad veram expressamquē doctrinam informaret. Quum repente eò permotus animi ardore, quò ad optima quæque raptiebatur, novam sibi asperioresquē vitæ rationem suscipiendam ratus, quā precibus, quā lacrymīs, à supremo Ordinis sui moderatore impetravit, ut in Americæ Insulas, quæ sub Gallorum ditione sunt, navigaret, ibiquē pro barbarorum salute totis artibus elaboraret. Quæ verò tum fuerit ejus dexteritas, quæ fortitudo, quæ diligentia, quæ constantia, ut errores, qui animis jamdiu insederant ac vetustate inveteraverant, eradicaret omnino atque deleret; ut libidines comprimeret, & vocibus exemploque vinciret suo; ut mores ad sordiditatem componeret; ut efferos homines ab errore ac turpitudine abductos ad veritatem alliceret, inflammaret, impelleret; efficeretquē, ut res divina

(XVIII)

divina pura semper , integra , & incorrupta mente , & voce coleretur ; nôrunt omnes quotquot habuit laborum comites atque participes . Hæc tamen missa facio ; quòd ardor Bremondii nullis coercendus angustiis ad nobiliora longè contenderit . Profecto bis ea loca pestilentia laborarunt . Quem autem tunc se gessisse Bremondium arbitramini ? Eò exarsit ægrotis ministrandi studiò , ut non semel , sed iterum contractò morbò , parum abfuerit , quin prudens , & sciens se in perspicuam mortem conjiceret : (a) animamque fortiter libenterque pro amicis suis posuisset , in quo tota Christiani hominis virtus perfectioque continetur , nisi à suis , quorum dicto semper audiens fuit , in Galliam revocatus fuisset , & ad majora in dies perficienda divinò propè consilio reservatus . O verè præclarum facinus , & nulla unquam laudis magnitudine exæquandum ? cui Bremondus non secus ac supremo actui se ostentaret oportuit , ut omnibus , pro salute quorum bis morti caput objecerat , satis vixisse judicaretur . Quare celebrabuntur cæteræ ejus laudes : hoc tamen erit illi summum atque præcipuum , hoc gloriam ejus omnem perficiet , quòd oblitus sui , quòd suorum studiosissimus , quod universorum felicitati devotus , consummatus in brevi expleverit tempora multa ; quippe qui satis sibi vixerit , satis suis , satis omnibus . Itaque , si velimus non quamdiu vixerit , sed quomodo vixerit , animadvertere , non erit dolendum , Auditores , quòd vi residis sanguinis inopinatò correptus , cui sanando diligentissimus remediorum usus impar omnino fuit , ad supremum vitæ spiritum adactus sit ; & post edita plurima pietatis patientiaque signa , tandem vi morbi oppressus , tres & sexaginta natus annos , inter suorum lacrymas , extrema humanæ vitæ officia persolverit . Tempus enim jam erat , ut , qui cursum feliciter consummaverat , repositam sibi coronam justitiæ assequeretur : spera-
re enim

(a) *Vid. Act. quinque Martyr. Sinen. pag. 251. & seq.*

(XIX)

re enim licet , quod Deus , qui in voluntate sua illum deduxerat , tenueratque manu dexteram ejus , cum gloria tandem suscepit . Igitur id unum superest : ut egregias ejus virtutes , quas non sine admiratione aut vidimus , aut audivimus , nobis non ad intuendum magis quàm etiam ad imitandum , proponamus : non solum enim doloris acerbitatem ingenti consolatione leniemus ; sed eundem in nobis quotidie florentem , sospitem , redivivum , eaque prorsus immortalitate , quâ , si fieri potuisset , paulò antè optabamus , donatum esse intuebimur .



KSIEGARNIA

WYDAWNICTWO

ANTYKWARIAT


WYDAWNICTWO




WYDAWNICTWO

10.4.11

XXXXXXXXXXXXXXXXXXXX





E. 13, 262

1700,



